

上饒縣志卷十一

列女

列女自古有之太任太姒女中稱聖尚矣秦漢以來如辛
憲英曹大家陶侃王珪之母梁鴻許允之妻昭然史策夫
古之所有今亦不乏吾觀上饒終身守節顛沛捐軀往往
而有是亦歲寒松柏也

明

施氏王伯剛妻名貞年十九而伯剛卒自矢柏舟人或以
無子撓之施以死辭居常閉門一婢相守寂如也撫教繼
子輔官增城知縣卒年七十八 明一統志

祝氏名臨姑歸鄭孔貫年二十六而貫亡撫子麒娶劉氏
名錦雲年二十九而麒亡姑婦相繼守節姑年八十三婦

上饒縣志 卷十一 列女

年七十三吳門都穆作鄭氏雙節傳

陳氏龔潤妻潤舉鄉試上春官天順癸未之變死焉時陳
年少甘貧守節不以無子異其心 明一統志

劉氏汪芳妻芳病廢貧甚謀遣之泣曰夫貧且病妾命也
敢不以死從傭紡織以給朝夕正德庚午姚源賊至劉護
芳不忍去賊欲污之不從斬芳首以脅之罵益厲遂遇害
團氏鄭贊妻姚源賊至團度難免使夫舁其姑先走自負
子從之不及被執賊欲辱之給曰有釵釧匿窖中願往取
偕行賊解其縛遂并其子赴水死 明書

朱氏歐陽福祐妻年二十三而寡姑難其少且貧使更適
矢死不從姑病革割股療之比卒哭之慟朱後以壽終
葉氏周瑗妻永豐人年十八瑗卒無子立姪誌為嗣娶

氏亦無子早寡清苦守節葉氏實倡之也

姜妃一齋孫女即中性女也事宸濠濠敗妃赴水死初濠有逆志妃嘗泣諫不聽既就擒檻車北上與押檻官言往事輒痛哭曰昔紂以聽婦言而亾國孤以不聽婦言而亾身邑人鄭毅以詩哭之曰道義傳心有定論賢妃原是一齋孫

按王陽明年譜濠見陽明輒曰姜妃賢妃也自始事至今苦諫未納適投水死比使往果得屍周身皆綿繩內結姜為諒女有家學故處變能自全則妃之賢見矣但不知為性女也蓋年譜之誤耳

信乘續葑

毛氏王綵妻年二十三守節姑陳氏亦少寡慮氏難守以已居孀艱苦事諷令改適氏撫子泣曰夫死義不獨生所

上饒縣志

卷十一 列女

二

不死者有孤在耳刺指流血為誓奉姑撫孤苦節能貞子建中年十三補邑庠二十領鄉薦仕至大理知府奉勅建坊有旌節錄楊時喬為之序

周氏朱朝相妻年二十五而寡子邦昌纔七歲紡績課讀孀居五十年子亦成立以孝稱御史徐養心給絹幣旌之曰天挺節孝郡守徐瑋旌之曰勁節克孝

魯氏丁九舉妻年十六歸九舉二十而夫歿遺一子未幾亦死父母憐其少勸令改適氏截髮自誓守節終身年八十七卒事聞臺使奉詔旌表并署其門曰貧窮擬守孤兒志風雨應憐寡婦門

徐氏鄭某妻名鳳英開化鄉徐近龍女幼適同里鄭氏丙戌之亂時值歸寧舉家被執氏急以稚男邦祚授弟天麟

去中途從馬上奮投龍潭高崖下碎身而死兵衆駭愕却走麒與邦祚遂得免至今人多哀其死而嘉其烈焉

張氏貢生葛人臨妻避亂靈山賊四至知不免投水而死姜氏王袞妻大叅廓之母也年十六歸王事姑以孝聞訓子嚴謹二十五而夫卒矢志苦節享年八十而終兩院題旌鼎革未果所請

舊志失載今考省郡志補入

程氏生員周泰寧妻年十八泰寧沒氏願身殉見姑老子幼遂以身任未幾鼎革寇虐舅氏慮無依倚逼令再醮氏泣曰保姑護子正在此時以流離易志禽視我也舅迫之益促時子祉鎬方八齡見逼而怒以墨筆投之為汁所汚不啻以手摑者舅羞而止由是携姑與子狼狽道途備嘗辛苦乃獲全年八十知府孫世昌知縣馬之驥有女節子

上饒縣志

卷十一 列女

三

孝節孝冠世之旌方議題請建坊氏謂子曰遭時不造祇求下報九泉忍為立名地乎事遂寢卒年八十一

程氏寧海州同王汝冕之媳庠生枏之妻幼習家範舉動有禮年十九夫亡勤事舅姑撫養二子課讀不怠長紹麒次麟俱入泮壬午知縣張國光詳請按院給扁旌獎

舒氏焉其妻賜坊旌表在西隅阜民坊今毀

徐氏官生楊德潤妻崇禎十年請旌建坊東隅

樂氏周璉妻三十三都人旌揚苦節建坊其里

國朝

陳氏童士祺妻避亂坑頭被賊擒逼携二子俱溺死于山
茄塢塘郡守曹鼎望旌曰節孝兩全縣令馬之驥旌曰一
門節孝

徐氏鄭某妻生員徐炳煥祖姑順治初被兵擄縛其夫挾
氏上馬誓死不從遂射殺其夫氏罵不絕口兵怒并射殺
之

何氏郭允相妻順治十七年夫故年二十八苦志守節撫
幼孤偉成立列邑庠卒年八十餘

祝氏生員鄭文登妻年二十而文登夭願與偕亡舅姑委
曲勸慰乃止奉養益謹舅姑憐其艾囑鄰姑諷之正色厲
聲曰再醮必須再世舅姑亡葬祭如禮撫姪颺為嗣颺後

上饒縣志

卷十一 列女

四

列郡庠祝年八十一而終

翁氏鄭世禧妻名淑英霍村人年二十二禧死遺一子二
女年餘子又不祿矢志守節雖笑笑孑立之死靡他焉

余氏徐公調妻名鳳英適徐生而不育乃繼二嗣夫病將
危囑以父母年老生事葬祭惟爾是賴氏時年二十六哭
夫柩前以節孝慈三事自誓奉舅姑益加謹恪歷久不衰
卒年皆八十餘祭葬盡禮鄉黨咸欽重之

鍾氏生員鄭祚鉅妻二十而寡生子甫月撫之成立不幸
子夭復撫稚孫身任二世劬勞孀守六十餘載邑令王緯
玉山令葉楠皆旌其堂

盧氏邑廩生鄭三錫妻康熙十五年大兵恢復郡城餘逆
尚聚永豐二月十四日黎明偽總兵郭忠孝統賊突至水

南恣肆擄掠氏與十歲子俱被擄迫令就道不從賊以刀
加其頸罵益厲賊怒斫其頭拉子去越旬日子逃歸徧尋
母骸于積屍中血汚不能辨其首因跪泣曰是我母目當
開一屍雙目果開驗之不爽其靈異如此

葉氏彭大垣妻萬年訓導振鎔母明少司寇鏜之元孫女
也年二十六而夫逝鎔甫九齡矢守不二翁姑以年老家
貧恐難自立微諷他適即仰天痛哭以死相期忍餓耐寒
歷盡艱辛卒年七十

翁氏盧居儒妻日章母甲寅兵亂舉家避兵廿九都丙辰
三月初八偽都尉白搜山焚掠氏與姑避入深山賊偵知
之縱火延燒燄將逼姑促之出顧謂姑曰姑年耄出無妨
吾寧死于火決不為賊污惟善視吾兒足矣言畢火至時

上饒縣志

卷十一 列女

五

懷妊七月火燒腹裂胎亦墮出其慷慨赴死如此

呂氏周維城妻明進士夔曾孫女年十七歸城城以力學
致病卒氏年二十三願以身殉娣姒以遺腹未產勸慰乃
止越兩月舉遺孤氏堅心守節截髮毀容示不可奪家貧
紡績備歷艱辛者三十餘年忽一夕謂子曰吾所以不死
者以汝故今幸成立吾擔已弛行將從若父于九原明日
還省外家陰為訣別歸之日無病溘逝人謂其節之苦而
死之異云

徐氏庠生余嗣登妻明季寇肆虐氏避瀘西內毛源遇賊
悅其姿欲亂之氏給曰我宦家婦多金姑緩我同取之賊
喜從至萬靈橋墜橋而死

鄭氏邑庠生詹俊妻氏年二十一而夫卒遺腹生一子名

世濟時家貧子幼有勸以再醮者氏泫然流涕曰夫亡子幼此何時也夫門宗祧絕續繫我忍異志乎自是食力于紡紆以育子卒年五十九

汪氏程尚仁妻避康熙甲寅寇夫妻失散寇傷甚氏度不能脫抱乳子躍湖潭而死時年二十五歲也

胡氏汪元楨妻楨卒氏年二十八矢志撫孤終身不御華飾教子孫甚嚴故次子焜孫坦鰲璽俱列宮牆卒年五十一郡守周錚元以節並松筠表之

葉氏徐日哲妻年十八歸徐七載夫亡姑老子幼內外無依氏堅意自守以奉姑撫孤為己任姑以哭子喪明垂二十載左右護持日夜禱祝日漸復明子世煒日督以學得列膠庠雍正四年奉 詔表其門

上饒縣志

卷十一 列女

六

熊氏豐城同知熊在鶴之女廣西叅將孫朝選之妻也年十八來歸十九夫故氏無出有妾子煊撫如己出扶柩歸歷洞庭鄱陽之險舟几幾覆滴血叩天波濤乃息歸後復遭火災抱子出烈焰中僦居鄰家業蕩然夫兄孫孟公逼奪其志破容剪髮訴官乃免雍正十三年事聞 詔旌其門今年七十餘猶縫窮度日

鄭氏汪爨妻歸三載而夫喪年二十歲以遺腹未產翁姑垂老矢志守節越一月生子敬事舅姑保護遺孤華飾不御慶弔不與三十年如一日乾隆二年年五十有一榮邑令程光鄂申詳請

旌勅建節婦坊子寧遠名列成均孫亦多人差足以酬苦志也

翁氏王慶綸妻年二十三而夫逝長子甫三歲次在胎氏哀痛幾絕念姑老子幼且未產者延之數月幸得男氏決意撫孤與姑勤織紡以佐家計姑性嚴氏事之得其歡心今歷二十八載族鄰莫不欽嘉子思頰思滋亦能究心舉業雖慈以畜之仍不失教也

汪氏生員鄭養沛妻年二十八而夫卒無嗣止一女氏悲痛幾絕隣婦有以再醮叩其意者氏曰翁姑垂老幼叔零丁誰養誰撫吾一身實繫鄭氏存亡也因矢志不移迨後叔養潤有子氏撫其次以繼夫後今年近五旬節操如昔人以為難

郭氏生員周涓妻事涓時祖姑在堂氏左右之得其歡心涓卒氏年二十八悲痛幾絕見舅姑衰邁孤子零丁且上

上饒縣志

卷十一

列女

七

事下撫一無所資氏心力俱瘁用能衣食不缺教育有方以竟夫志其節與孝皆從艱苦中成之有足多者

寓賢

仕曰名宦遊曰流寓其為賢者所托足一也今邑志所紀代不乏人意者佳山佳水高人樂居乎夫人或震耀一鄉沒則已矣而哲人君子雖千里萬世之遙偶一寄跡于斯而人徃風微百世下猶為之原其里居誌其出處流連慨嘆恨不與之並生焉均是人也或近而忘或遠而慕何哉蓋士不紉蘭為佩而化荃為茅故也

唐

陸羽字鴻漸一名疾字季疵復州竟陵人上元初隱居茗溪號桑苧翁召拜太子文學徙太常寺太祝不就寓居信城北三里自號東岡子性嗜茶環居多植茶因號茶山刺史姚驥頻就訪焉嘗著茶經三篇鬻茶者目為茶神祀之上饒縣志卷十一寓賢八

又御史蕭瑜領洪州羽自信州移至洪州玉芝觀瑜喜與之唱和成帙權德輿為之序

宋

呂本中字居仁紹興進士累遷中書舍人兼侍講嘗同秦檜為郎檜既相有引用意本中封還除目彖以草制忤檜諷御史劾罷屏居茶山寺僧建祠祀之謚文清

辛幼安名棄疾號稼軒其先歷城人淳熙間卜築邑之帶湖紹興中金人南侵棄疾為義士耿京奉表來通授太平軍掌書記未幾京被殺棄疾遂留居鉛山後歷官兵部侍郎樞密都承旨卒德祐初贈少保謚忠敏

魯幾字吉甫其先贛州人徙河南初授將仕郎累遷江西提刑會兄開忤秦檜和議罷歸奉祠僑居茶山寺七年自

號茶山居士檜死起為浙西提刑知台州尋為秘書郎權
簽禮部侍郎遷通奉大夫卒謚文清宋史論曰幾積學潔
行風節凜凜陳嘗膽枕戈之言以贊親征亦壯矣哉
鄭望之字顯道彭城人少有文名靖康初再使金營累官
至吏部侍郎以徽猷閣直學士致仕僑居上饒區曰寓屋
弟資之字深道仕至吏部侍郎亦居溪南嘗開山路成兩
巖對奕其上名壽松巖

韓元吉字無咎開封人維之子仕至吏部尚書龍圖閣學
士封潁川公嘗師尹焞呂祖謙其壻也師友淵源為諸儒
所推重徙居上饒所居之前有湖水號南澗澗南有園築
亭竹間號蒼筤與兄元隆俱登甲第卒塋城東所著有愚
藟錄周易繫辭等書子琥字仲止號澗泉與趙奉泉同時

上饒縣志

卷十一 高賢

九

有詩名稱二泉先生方虛谷詩上饒有二泉指此
晁讓之字恭道澶州人渡江親族離散極力以卹因居信
州環居種竹號竹院官至敷文閣直學士卒塋鉛山鷺湖
子孫因家焉

周聿字德元青州人徙居上饒紹興間召對陳經綸在濟
策稱旨自司農寺丞累遷刑戶部侍郎所著有春秋大義
易說等書子舜元字濟美嘗為州牧省郎皆可紀述親喪
杜門謝客蔬食三年

趙不迂字留臣嘗創書樓于上饒吟咏自適兄不遜字茂
嘉後改名不過登進士第為清湘令建善濟倉于鉛山天
王寺

尹穡字少稷兗州人博學能文登孝宗朝進士累官殿中

侍御史後遷至右諫議大夫紹興間僑居懷玉山以方名齋徙上饒溪南之大霞宮開軒種竹曾文清以友直名之王傳字巖起蓬萊人僑居上饒嘗赴淮東提舉呂東萊贈詩云隨行萬卷書既足以自娛因知君所樂不在使者車可以見其人矣

王洋字元渤東牟人仕至起居舍人嘗居城之南池賦詩自適曾文清和之且嘗為叢珍集酬唱之盛甲于一時周墮字仲固仕至湖南轉運判官嘗徙上饒廬所居曰尚論呂東萊有詩

朱熹號晦菴愛邑治南巖山水之勝嘗寓其地講學多見題咏又與陸復齋象山呂東萊講道于鵝湖當時有障百川迴狂瀾之稱後人思其風建祠于南巖祀之

上饒縣志

卷十一

藝文

十

國朝

陳璋字青蓮號珠菴陝西鬱林人善琴工詩自號三痴老人不投時好惟耽山水歲丁巳叅戎劉景榮遇于采石挈之俱來在署數年罕所接見及病旬餘忽坐起書一律一絕而逝時年七十二塋于景德寺側人競呼為仙人墓其詩曰飄然撒手謝乾坤好向靈峰覓舊村魄似閒雲歸岫谷身如野鶴老松根閱殘大海千山景贏得紅塵一土墩笑我浮生空蝶夢來無踪跡去無痕 原在清涼世界過翻身苦海作痴魔幸今未失本來面依舊歸山入靜窩

仙釋

二氏之學始于周末至後世而更甚其中志趣各殊賢否自別而有清曠者出其間縈已自修或亦有托而逃也君

子取之更有好奇善幻頗能濟人利物此又仙釋中之以異術聞者擇一二書之以見于世無益而有益

詹大順字德常太霞宮道士精地理嘗為丞相劉正夫卜其先兆期以十八年後子孫當居宰輔果驗正夫為上言之政和七年詔赴闕大順固辭正夫叢糴作書促之乃赴闕賜對便殿詔授冲虛法師視朝散大夫陽德觀住持凡五賜對重和元年授元素大夫屢請還山詔知鴻都觀建炎三年羽化壽八十五

徐仁旺白雲山人嘗與丁晉公議遷陵寢事仁旺欲用牛頭山前地晉公定用山後地爭之不可乞禁繫大理以俟三年之驗卒不能回仁旺表言後地之害坤水長流災在丙午歲內丁風直射禍在丁未年中聞者不以為然至金

上饒縣志 卷十一 仙釋

人犯闕果在丙午年而丁未以後諸郡焚畧之禍相仍不絕其言無不驗者

夏日葵號雲岩幼為谷神觀道士年二十雲遊四方異人授以方書遂精通道法及天心五雷訣歸值大旱郡守林公延至祈于社稷壇期以三日得雨果驗命掌都紀事住持本觀其他縛妖治病靈異甚多卒年六十餘法徒孫方有常得其傳書亦以道術顯郡守蔣如竒旌其廬曰世承玄錫

慧覺禪師須江人姓徐氏唐憲宗嘗詔入麟德殿說法帝加欽重壽七十四勅謚慧覺立見性塔

廣心禪師號養菴叢桂坊人姓鄭氏華山僧真定法嗣也居家孝友一日聞客談含生皆有佛性遂決意出世禮翠

峯祝髮入燕都訪華山真定定以雲門六不收公案驗之
當下脫然定囑曰濟宗一派古今流本分生涯六不收百
尺竿頭親撒手直須海外下金鈎師大悟歸住靈山中臺
旋上峯頂見大義禪師舊址斬草重興遂禪律兼行用無
縫鎖一把掛法堂榜曰上古流傳鎖憑君智鑰開若無開
鎖法相見不須來壽八十一塔于本山唐帽峯嗣法席者
舒州慧林本寂乃養菴嫡孫四祖起高和尚法子也

智間禪師號雪關六十一都人傅崇儉子也叅博山究船
子藏身公案偈曰直下相逢處由來絕覆藏舌頭原是肉
嚼破也無妨山不肯點頭謂其風骨太露乃拚關謝客懸
鏡反參偶作雪關歌呈之山始待以座嘗受瀛山請居無
何博山回首師往來瀛博之間觀察曹公請住鼓山再興
上饒縣志 卷十一 仙釋 十三

湖墅佛事莊嚴後病于瀛山微笑而逝

附雪關歌

天地一蘧廬古今誰構始而我拚斯關安居毛孔裏毛孔
不窄闊不寬金烏玉兔時往還照見幻栖關裏事玲瓏八
面潭無阻坐聽流泉松下鳴倒看雲影峯頭露青天放眼
瞳不覩石人欬唾生風雨有時藏身沒蹤跡檻外橘枝分
野色有時沒跡莫藏身釣盡寒潭躍浪鯨此關何為雪呼
六六月紅鑪飛霞撲我關不記春與秋花開葉落山常幽
我關不占天和地一段光明覆無際我關非內亦非外扁
舟蕩漾遊滄海我關非動亦非靜旋嵐偃岳心恆定萬象
為闕闕萬象空合空今聯帝網卑而不下高不危踈而不
漏暗復朗誰謂此關小圓合大虛無欠少誰謂此關大只

在一塵含法界法界所有關中聚笑擲大千為戲具法界
無物關中空放開捏槩如游龍龍飛虎步咨騰踏板橋忽
動霜蹄滑劈破雲門一家關剔起眉毛還險煞有問關中
主若何指頭無縫全機活

祥異

廟對封事董相京房詳畧不同究其歸則一也儒者謂漢
儒好言機祥或失之誣然考之春秋稽之洪範聖人不諱
上饒一邑星日山川草木禽獸之變亦不勝書此固闕天
下大故兆誠不獨方隅而渡河反風珠還蝗避一邑之政
亦足以弭一邑之變豈曰治有大小哉

宋

皇祐二年夏六月洛水壞城沒官舍湮民居

上饒縣志

卷十一 祥異

十三

淳祐壬子大水高于城東北隅迤南一帶幾無留甍

元

順帝四年六月靈山裂

明

永樂乙酉大水溪流暴漲泛濫通衢瀕河之民湮沒無算

丙申大水

宣德八年大水壞公私廬舍數百家溪谷易處歲大侵

辛酉十月雨麥

乙丑九月十三日夜地震官民房屋皆有聲

正德二年夏四月大雨至冬十月歲大飢民食薇蕨

四年天雨黑子如梧桐子大

五年雨雹大如鷺卵壞廬舍折木殺禽獸禾稼盡傷秋七

月災

六年天雨黑麥

七年天雨黑子人試種之出葉如戈戟

八年十一月雨雪三十日溪沼冰花如樹木之形

九年八月朔日食之既晝晦恒星見鷄犬驚鳴

十年八月辛卯日食晝晦雞鶩皆啼占為諸侯謀王其國不昌終受其殃後已卯宸濠反費宏詩久疑日食似黃昏十五年四月大雨雹積地盈尺殺飛禽走獸大木拔廬舍壞麥無秧苗夏大水崩崖堙谷大損田廬民以飢殍鄭岩山有水災歌載藝文中

十六年元日昧爽有星流于東北赤光如帶橫亘不滅者久之

上饒縣志

卷十一

祥異

十四

嘉靖元年五月霖雨連漲比成化壬寅水高三尺六年滂傷無黍禾

八年大水入城湮沒預備倉及公私廬舍

三十四年春彗光燭于北斗

四十年四月大雹傷菽粟牛馬甚夥

萬曆十年秋彗星出于奎婁之分月餘乃滅

十七年大饑五月至八月不雨疾疫餓殍交橫于道路

十八年仍大旱冬霖雨菽麥萎爛米價貴

十九年辛卯七月永樂鄉水自大橫嶺石罅出瀾漫至楊家店湮沒民居二十餘家淤塞田禾二百餘畝

三十二年甲辰冬十一月初九日夜地震屋為之傾聲聞數百里

天啓二年癸亥大水河流冲激沒至城櫓鱗至民居漂沒
鱗重三百餘觔漁人得之郡丞鄒潘命仍放之河

崇禎元年戊辰七月十九日洪水木俱拔田廬人畜多湮
沒

八年三月初三日水雹自西北鄉來大如雞卵折壞屋木
無數太守張應誥有三月行詩詳藝文中

夏五月初十日夜暴雨水自玉山起瀾漫城邑二百餘里
田廬湮沒有舉家盡漂流者是夜鍾靈石橋圯次日水始
退太守張應誥有五月行詩詳藝文中

九年丙子五月熊入城止林姓家屋上歲大旱斗米銀三
錢民幾變賴守道林日瑞率屬賑濟乃安

十二年六月初一日闌闌坊火自西南至東城延燒三百
上饒縣志

卷十一 祥異

十五

餘家南門樓燬

國朝

順治三年丙戌大旱

四年丁亥大旱米價至八兩一石民採西北鄉山中石粉
和米作粉療飢因名為仙粉

十七年十月縣署後堂棟間產靈芝一本知縣程汝璞因
扁其堂曰芝筵

康熙六年丁未五月霪雨田禾勞傷無籽粒

九年秋七月旱災禾盡稿冬積雪深四五尺人畜凍死鄉
城為之不通

十年夏五月至秋七月不雨蟲食禾稼盡則食木葉民採
蕨拾橡以食至冬蕨橡亦盡民益得食無所次年春巡撫

部院首倡捐賑于是司府廳縣各捐俸有差又請發常平倉暨捐穀七千六百餘石分賑飢民賴以全活

十一年夏南北兩鄉麥一莖兩歧

十七年戊午大旱無禾

十八年己未旱魃大祲

十九年冬十一月初三夜西方出白氣如練直指東北方初六夜長星見光芒數十尺如劍仍指西方經一月始退三十一夏秋亢旱不雨

四十九年十一都地震靈山崩裂二十餘丈

五十一年大有年

雍正九年六月三十日大水靈山崩十餘丈萬安橋圯壬子鄉人募修之邑庠毛豐有古風紀異見藝文

上饒縣志

卷十一 祥異

十六

乾隆元年游蛭生蛭游水面纏禾根即損民苦之

四年正月十九日南門外火延燒至河街官埠頭止燬民舍百餘家

四年叅署隙地產靈芝一本五年六年俱復產叅將劉景榮因以瑞芝名其軒

七年三月大雨靈山石崩聲聞十餘里

八年自正月至五月靈雨不止損壞秧稻幾無籽粒夏間穀價騰貴知府陳世增知縣汪文麟發倉糶米減價糶賣又徧徃城鄉勸諭富民借糶並行民賴以甦

八年十二月間西北方有星出白氣如練直指東方至九年正月月中旬始退

九年四月二十六日有星殞于四十九都小黃沙地方聲

如砲大如斛入地二尺許色黑如朽木易碎
九年夏大旱早稻傷七月初六日大水沿河民居田園有
損是夜鍾靈橋靈溪橋俱圮

浣縣志卷十一終

浣縣志

卷十一

祥異

十七